



**S**Teno Sture Caroli regis Sueonū nepos post Sauūculi fata magno omnium procerum & populorum consensu Gothorum & Sueonum princeps eligitur. Hic totis triginta annis subiecta regna tanta tranquillitate & foelicitate administrauit, ut Augusto foelicior & Traiano melior dici potuisset. Nam Christiernum regem Daniae magno praelio uicit, & sibi Suetiae regnum confirmauit. Postea Suetiae tumultus composuit, & seditiosis eiectis pacem ubique restituit. Pietas eius tanta fuit, ut à nullo facile superaretur. Nam sacerdotibus stipendia auxit, & Ecclesias hinc inde uarijs donis exornauit. Regium etiam nomen contemnebat, atque se omnium fratrem uocabat. Habebat praeterea passim in omnibus regni locis suos ministros, qui praefectos obseruarent, atque eorum malitiam clam ad se referrent. Itaque singulos in officio continuit, atque magna foelicitate suum regnum gubernauit. Cum etiam Moscouitarum dux ei hanc foelicitatem inuideret, atque eius ditionem uastaret, Steno obuiam magno animo ei processit, atque memorabili praelio uictum ad sua retrocedere coegit. Tandem uerò suorum seditione Iohannes Christierni filius Danorum rex in Suetiam uocatus fuit. At Steno uires colligens eundem repressit, & breui totum regnum in pristinam libertatem restituit. Omnibus etiam benignè hanc defectionem remisit, & subditos in gratiam recepit. Ita ut passim de eo caneretur: Parcere substratis est nobilis ira Stenonis. Cum hoc modo diu praefuisset, tandem Anno Christi natiuitatis millesimo quingentesimo tertio o-

bijt, & magnum omnibus sui desiderium reliquit. Huius nepos Gostaftaus hodie magna gloria Suetiae regnum administrat, Iohan, Mag. lib. 23. cap. 14.